

## DOMINGU XXX TEMPU KOMÚN – TINAN A

### Tema

Liturjia Domingu Komún XXX dehan mai ita, ho modu klaru katak domin mak sentru esperiénsia sarani nian. Buat ne'ebé Maromak ezije husi sarani ida-idak mak husik domin hakonu nia fuan.

*Evanjellu* dehan momoos mai ita, katak Maromak nia revelesaun tomak habadak iha domin – domin ba Maromak no domin ba maluk sira. Ukun-fuan rua ne'e labele haketak malu: “hadomi Maromak” katak kumpre Ninia vontade no estabelese ho maluk sira relasaun domin nian, solidariedade nian, partilla nian, servisu nian, to'o don total moris nian. Buat seluk mak esplikasaun, dezvoltamentu, aplikasaun iha vida pratika koordinada fundamentál sira moris sarani nian ne'e.

*Leitura dahuluk* garante ita katak Maromak la aseita situasaun permanente injustisa nian, arbitrariedade nian, opresaun nian, respeito-laek ba direitu no dignidade ema sira ne'ebé kiak liu no fraku liu. N.e. leitura ko'alia kona-ba situasaun ema estranjeiru sira-nian, oan-kiak sira-nian, feto-faluk no kiak sira vítima espekulasaun husi ema sira ne'ebé empresta: krime naran de'it hasoru ema kiak no fraku liu mak krime grave kontra Maromak, ne'ebé hadook ita husi komuñaun ho Maromak no hasai ita husi Aliansa.

*Leitura daruak* apresenta mai ita ezemplu comunidade sarani ida (Tessalónica) ne'ebé, maski moris iha persegisaun, aprende atu la'o ho Kristu no ho Paulo, iha dalan domin no don moris nian; liuhusi ksolok no terus, nia sai fini fiar no domin nian, ne'ebé fó fuan iha comunidade sarani seluk iha mundu gregu. Husi esperiénsia komún ne'e, moris família boot ida maun no biin-alin sira-nian, halibur hale'u Evanjellu no namkari iha mundu gregu tomak.

### LEITURA I – Ex 22,20-26

“Dekálogu” eh “ukun-fuan sanulu” (kf. Ex 20,2-17) mak, lahó dúvida, núkleu Aliansa nian no apresenta valór fundamentál sira ne'ebé tenke marka Maromak nia Povu nia komportamentu, iha relasaun ho Jahwéh, no iha relasaun ho vida komunitária. Maibé lei sira “Dekálogu” nian mak lei jerál no la konsidera kazu no situasaun hotu...

Kompleksidade vida loroloron nian obriga, atu iha esklaresimentu no konkretizasaun ida ba lei sira apresenta iha “Dekálogu”. Nu'udar konsekuénsia, mosu norma foun sira, konkreta, ne'ebé regula Povu iha nia moris loroloron nian. Bele hetan regra sira ne'e iha Livru Ézodu nian.

Tuir “Dekálogu”, iha fatin onra nian, katekista Israel nian tau bloku lei oioin ida hanaran “Kódigu Aliansa nian” (kf. Ex 20,22-23,19). Lei sira-ne'e autór Livru Ézodu nian apresenta nu'udar Maromak mak dita ba Moisés iha Sinai; loloos, lei sira ne'e mai husi fonte oioin, no nia tempu mós la hatene didi'ak, maibé maioria komentadór sira lori ba tempu “juiz sira-nian” (sék. XII mK).

“Kódigu Aliansa nian” mak bloku lejizlativu ne'ebé regula aspetu oioin Maromak nia Povu nia moris nian, husi kultu to'o relasaun sosiál sira. Nia mak konjuntu ida preskrisaun sira-nian, solusaun sira, dispozisaun loos, di'ak no metin, ne'ebé fó solusaun ba difikuldade sira, esplika prinsípiu sira no tau orden ba ema nia konduta iha situasaun komún sira no lahanesan kondisaun umana nian. Iha nia destaka, la'ós de'it konxiénsia katak Matomak bolu Israel ba

komuñauñ ho Nia, maibé mós sentidu sosiál maka'as. Kódigu hatudu Povu ida nia preokupasaun atu konkretiza kompromisu sira Aliansa nian iha moris loroloron nian. Sujere katak Israel nia fiar la'ós realidade ida abstrata maibé realidade ida moris nian, iha seitór hotu vida prátika nian.

Testu ne'ebé ohin propoin mai ita mak parte ida “Kódigu Aliansa nian”.

## *MENSAJEN*

Ita-nia leitura refere ho modu ezatu ba ezijénsia sosiál ruma ne'ebé rezulta husi Aliansa. Nia apresenta indikasaun konkreta ruma kona-ba forma oinsá konvive ho realidade tolu, nesiedade nian, frakeza nian: 1) ema estranjeiru nian, 2) oan-kiak no feto-faluk nian, 3) ema kiak ne'ebé forsadu atu empresta osan. Ema sira-ne'e moris situasaun difisil, iha ámbitu jurídiku, sosiál no ekonómiku.

“Ema estranjeiru” lakon nia abut, tenke sai hui rai rasik no dook husi familiár sira no tama iha ambiente kulturál no sosiál ne'ebé la simu nia, no lei lokál sira la proteje sira-nia direitu no dignidade. Ema aproveita sira-nia situasaun atu esplora sira, halo sira sai atan no hetan injustisa oioin.

“Oan-kiak” no “feto-faluk” integra iha kategoria vítima tradisionál abuzu nian husi parte ema kbiit-na'in sira nian. Sira la hetan protesaun, juiz sira no dirijente sira la interese sira, laiha defeza iha ema forte sira nia oin, vítima injustisa oioin, no Jahwéh de'it mak sira-nia defensór.

“Ema kik ne'ebé husu osan” mak ema kamponés/serbisu iha to'os, ho tusan impostu nian, lakon buat hotu tan produitu to'os la dí'ak, nune'e presiza empresta osan atu selu tusan sira no sustenta família. Empresta-na'in sira empresta ho funan boboot, no obriga sira husik peñór sira-nia soin báziku liu. Ho jurus aas liu, sira lakon buat hotu no moris mukit, to'o mate tan hamlaha eh malirin.

Maromak la aseita situsauñ injustisa nian, arbitrariedade nian, opresaun nian, respeitu-laek ba ema kiak no fraku liu nia direitu. Se Israel hakarak moris iha komuñauñ ho Maromak no hakbesik an ba Maromak santu, nia tenke halakon eh bandu husi comunidade nia leet hahalok aat sira hasoru ema fraku sira – katak ema estranjeiru sira, oan-kiak no feto-faluk sira no ema kiak sira. Ne'e mak kondisaun ida ba manutensaun Aliansa nian.

## **LEITURA II - 1 Tes 1,5c-10**

Ita haree ona iha domingu liubá kontestu iha-ne'ebé mosu surat ba sarani sarani sira iha Tessalónica...

Haklaken tiha Evanjellu iha Tessalónica no halibur tiha comunidade ida ne'ebé moris no entuziasta, maioria husi mundu pagaun, Paulo tenke husik lalais sidade, atu halai husi judeu sira nia intensaun aat (tinan 49/50). Preokupadu ho Tessalónica oan sira nia fidelidade ba Evanjellu, Paulo haruka Timóteo ba hikas Tessalónica, atu hatene notísia no enkoraja sira iha fiar. Paulo hela iha Corinto bainhira Timóteo fila fali husi Tessalónica no apresenta ninia relatóriu. Notísia sira fó ksolok ba Paulo: Tessalónica oan sira mak comunidade ezemplár ida no moris iha entuziazmu no haka'as an atu moris tuir kompromisu sarani, maski hasoru difikuldade no ostilidade husi ambiente.

Paulo, haksolok no nakonu ho konsolasaun, hakerek ba Tessalónica oan sira hodi anima sira atu kontinua la'o iha dalan fidelidade nian ba Jezús no ba Evanjellu. Nia aproveita mós atu kompleta Tessalónica oan sira nia formasaun doutrinál no atu korrije aspetu ruma comunidade nia moris nian. Ita iha Primavera/Bailoron tinan 50 eh 51.

## MENSAJEN

Paulo kontinua agradesimentu naruk ne'ebé hahú iha vers. 2. Tanba sá agradesese?

Tanba Tessalónica oan sira hatán ho akollimentu/simun nakonu ho entuziazmu asaun evanjelizadora husi apóstolu sira (Paulo, Silvano, Timóteo) no Espíritu Santu. Komunidade sarani nia moris ba Kristu akontese iha ambiente ksolok nian, maski mosu inimizade no opozisaun husi parte judeu sira-nian no tensaun entre sarani sira no autoridade sira sidade nian.

Ksolok no sofrimentu halo parte dinamizmu Evanjellu nian, husi kedas nia hahú... Kristu ofere se nia moris to'o krús atu Liafoun-Di'ak Reinu nian to'o ba humanidade tomak; Paulo banati tuir Kristu no haklaken Evanjellu iha difikuldade no persegisaun nia leet; Tessalónica oan sira banati tuir Paulo no simu Evanjellu ho ksolok, maski mosu opozisaun husi sidadaun maluk sira; saran sira iha Grécia tomak ("husi Macedónia no husi Acaia", provínsia Roma nian iha Grécia) banati tuir Tessalónica oan sira no terus ho ksolok tan Evanjellu... Ho forma ne'e, hatudu sai katak Na'i, apóstolu sira no Kreda tomak partilla destinu hanesan: hotu-hotu la'o iha dalan hanesan, hodi Evanjellu nia roman, iha ksolok no terus nia leet.

Husi Jezús to'o Kreda nia istória ne'ebé hatutan malu hatudu katak Evanjellu sai dinamizmu ida moris no salvasaun nian ba povu hotu bainhira simu ho ksolok, maski iha sofrimentu no persegisaun nia laran.

## EVANJELLU – Mt 22,34-40

Evanjellu lori ita, dala ida tan ba Jerusalém, ba hasoru Jezús nia laron ikus sira. Líder judaiku sira iha ona sira-nia hilin no ideia definida kona-ba Jezús nia proposta: la'ós proposta ida mai husi Maromak nune'e tenke rejete... tenke denuncia, julga no kondena Jezús, ho forma ezemplár. Atu konsege konkretiza objetivu ne'e, responsavel judaiku sira buka argumentu akuzasaun nian kontra Jezús.

Iha ambiente ne'e mak Mateus situa kontrovérsia tolu entre Jesus no farizeu sira. Kontrovérsia sira ne'e apresenta an nu'udar hani ne'ebé organiza no monta didi'ak, atu bele kaer toman Jezús ho afirmasaun polémika sira, ne'ebé bele uza iha tribunál atu konsege ninia Ninia kondenasau. Depoizde kontrovérsia kona-ba tributu ba César (kf. Mt 22,15-22) no kontrovérsia kona-ba mate sira nia moris-hi'as (kf. Mt 22,23-33), ita to'o ba kontrovérsia kona-ba ukun-fuan boot liu Lei nian (kf. Mt 22,34-40). Ida-ne'e mak ikusnian... Hodi husu ba Jezús sá loos ukun-fuan boot liu Lei nian, farizeu sira buka hatudu katak Jezús la hatene interpreta Lei, nune'e la merese atu fiar nian.

Kestaun ukun-fuan boot liu Lei nian la'ós kestaun pasífika ida, iha Jezús nia tempu, basá nia sai objetu debate ne'ebé la hotu entre farizeu no doutór sira Lei nian. Preokupasaun atu atualiza Lei, atu bele hatán ba kestaun sira moris loroloron nian, halo atu doutór sira Lei nian hasai ukun-fuan 613, iha-ne'ebé 365 mak proibisaun sira no 248 asaun sira atu tau iha prátika. Ho "multiplikasaun" ukun-fuan legál sira hamosu kestaun prioridade nian: ukun-fuan hotu iha importánsia hanesan, eh iha ukun-fuan ida ne'ebé importante liu sira seluk?

Ne'e mak kestaun ne'ebé hato'o ba Jezús.

## MENSAJEN

Jezús nia resposta supera pergunta ne'e nia horizonte kloo, no lori ba nivel opsaun kle'an ne'ebé ema tenke halo... Buat ne'ebé importante, iha Jezús nia perspetiva, la'ós define sá loos ukun-fuan importante liu, maibé hetan ukun-fuan hotu nia abut. No, iha Jezús nia perspetiva, abut ne'e hadulas hale'u koordenada rua: domin ba Maromak no domin ba maluk.

Lei no Profeta sira mak komentáriu de'it ba ukun-fuan rua ne'e.

Sarani sira Mateus nian uza espresaun "Lei no Profeta sira" atu refere ba livru sira ne'ebé simu inspirasaun husi Testamentu Tuan, ne'ebé apresenta Maromak nia revelasaun (kf. Mt 5,17; 7,12). Nune'e hodi dehan "ukun-fuan rua ne'e habadak Lei no Profeta" (vers. 40), signifika katak iha sira hetan revelasaun hotu Maromak nian, katak sira soi totalidade proposta Maromak nian ba ema sira.

Sumáriu evanjéliku ne'e nia orijinalidade la'ós iha ideia sira domin ba Maromak no ba maluk, ne'ebé koñesidu iha Testamentu Tuan: Jezús temi de'it Dt 6,5 (kona-ba domin ba Maromak) no Lv 19,18 (kona-ba domin ba maluk)... Hanorin ne'e nia orijinalidade, husi sorin ida ita hetan, ho Jezús ne'ebé tau besik sira rua, iha paralelu, no husi sorin seluk, ho Jezús ne'ebé simplifika no konsentra revelasaun tomak Maromak nian iha ukun-fuan rua ne'e.

Kompromisu relijiozu (iha Testamentu Tuan no Testamentu Foun rezume iha domin ba Maromak no domin ba maluk. Iha Jezús nia perspetiva, katak sá loos buat ne'e?

Tuir relatu evanjéliku sira, Jezús nunka preokupa ho modu esesivu kona-ba kumpre rituál litúrjiku sira ne'ebé relijiaun judaika propoin, nune'e mós la sai delek ho oferesimentu don materiál sira ba Maromak. Jezús nia preokupasaun boot liu mak, dixerne Maromak nia vontade no kumpre nia ho fidelidade no domin. "Hadomi Maromak", tuir Jezús mak, sai atentu ba Aman nia projetu sira no buka konkretiza, iha moris loroloron nian, Ninia planu sira. Iha Jezús nia moris, Nia kumpre Aman nia vontade liu husi entrega domin nian ba maun no biin-alin sira, se presiza to'o saran an totál.

Nune'e, iha Jezús nia perspetiva, "domin ba Maromak" no "domin ba maun no biin-alin sira" liga metin ba malu. La'ós ukun-fuan rua lahanesan, maibé ukun-fuan ida ho oin rua. "Hadomi Maromak" katak kumpre Ninia projetu domin nian, ne'ebé konkretiza iha solidariedade, iha partilla, iha servisu, iha don moris nian ba maun no biin-alin sira.

Oinsá mak "domin ba maun no biin-alin sira" ténkeser? Testu ne'e esplika de'it katak presiza "hadomi maun no biin-alin sira hanesan an rasik". Liafuan "hanesan an rasik" la signifika kondisionalizmu narnaran ida, maibé katak tenke hadomi totalmente, ho fuan tomak.

Iha testu seluk Mateus nian, Jezús esplika ba Ninia dixípulu sira katak presiza hadomi inimigu sira no harohan ba persegidór sira (kf. Mt 5,43-48). Ne'e mak domin ida laho limite, laho sasukat no la distinge entre ema di'ak no ema aat sira, amigu no inimigu sira. Aliás, Lucas, hodi haktuir epizódiu hanesan ne'ebé Evanjellu ohin nian apresenta mai ita, hatutan tan istória "ema samaritanu di'ak" nian, hodi esplika katak "domin ba maun no biin-alin sira" ne'ebé Jezús husu ténkeser inkondisionál no atinje maluk hotu ne'ebé ita hetan iha ita-nia dalan moris nian, maski nia ema estranjeiru ida eh inimigu ida (kf. Lc 10,25-37).